

## CIUCIUMENGU

- Sh-eara unã moashi sh-pap, sh-nu avea ficiori. Sh-avea unã curcubeti acasã, shi dzãsi: Ai tora s-adrãm di curcubeta, unã ghelã. Tãljarã curcubetea, ama di curcubetea inshirã multsã shoarits. Sh-un shoaric – aua, altu – aclo, sh-un s-ascumsi dupu metura, un s-ascumsi aclotsi tu pãputsa a aushlui. Shi tora, aushlu dzãsi:

- Noi nu avem fumelji, aidi s-lu lom (dzãsi) aestu ta-s nã hibã shoariclu fumealji.

Sh-lu loarã, lu ãndreapsirã, lu spilarã, lu ãnviscurã, shi lji bãgarã numa Ciuciumengu. Sh-unã dzuã elji inshirã, lu alãsarã acasã Ciuciumengu, bãgarã ta s-hearbã fisulji, shi lji dzãsirã:

- Cuciumengu, noi va s-nem tu bãsearicã (dzãsi), a tini lipseashti s-minteshtsã niheam (dzãsi) fisuilu, ama s-nu l-minteshtsã cu njica lingurã, ma s-lu minteshtsã cu marea, ta s-nu cadz nuntru shi s-ti herghi.

- Ghini dado (dzãsi).

Sh-el nu lo marea, lo njica ciubanã sh-cãdzu nintru tu oalã. Vinirã aeshtsã di ãnpãzari iu eara shi di la bãsearica, grirã Ciuciumengu, Ciuciumengu, ma Ciuciumengu nu-l ari iuva. Sh-tora, plãmsi, plãmsi, plãmsi, sh-cãndu lo moashea s-adarã pitã. Sh-tora u adrã pita, a aushlu s-dusi ta s-lji pascã boilji. Sh-tora acãtsã moasha s-plãngã:

- Tsi s-adar (dzãsi), noari cari s-lji ducã prãndzu a aushlui.

Shi inshi atsel tsi eara ascumtu dupu meturã, aestu shoariclu (dzãsi):

- Abe babo, io va s-neg, va lji duc (dzãsi) pita!

Shi s-dusi el la aushlu, sh-lu ãntribã (dzãsi):

- Ore pap (dzãsi), pi cari cali s-trec?

- Em pi atsea din sus, (dzãsi), pi atsea din sus!

Sh-mãcã el peturi din sus. Deapooa, pap (dzãsi), pi cari cali s-yin io pãnã la tini, cari cali?

- Pi atsea di mesi!

Sh-mãcã el ghela di pita di mesi!

- Pi cari cali ta s-yin?

- Pi nai ma dighios (dzãsi) atsea tsi eara nai dighios!

Sh-măcã sh-cãlcãnjlju di pita. Sh-cãndu vini aclo sh-antribã:

- Iu i pita lãi Ciuciumengu?

- Em u măcai (dzãsi)!

- Ai tora tini shedz aoa ta s-veglji boilji (dzãsi), io va s-neg acasã ta s-mãc.

- Ama va mi măcã vãrã bou!

- Ascundi ti (dzãsi) aoatsi tu yiarba, sh-noari (dzãsi) ta s-ti măcã.

El s-ascumsi tu yiarba, ama boilji cum pãshtea, sh-un bou ãl măcã. Vini aushlu, ãl caftã Ciuciumengu, Ciuciumengu, ama Ciuciumengu nu-l ari iuva.

- Oiii, tsi s-adar!

Tãlje un bou, dzãsi: - Iu eshtsã lãi Ciuciumengu?

- Io escu tu briclu (dzãsi) a boilui.

Tãlje un bou, nu l-aflã. Tãlje alantu bou, nu l-aflã. Sh-cãndu, el intrã tu matsã la boi. Tricu un lup, eara multu, multu agiun, sh-mãcã matslu di bou, cãndu, tsiva, mutrea nuntru:

- Abe tsi-nj easti aestã (dzãsi) tu bric?

Sh-cãndu luplu s-dusi la un picurar, Ta s-li măcã oili. Sh-Ciuciumengu dzãsi:

- More picurar, (dzãsi), aestu lup tsi yini, va tsã măcã oili. Sh-aestu dzãsi:

- Cum va-i măcã lãi? Cãndu aestu luplu dzãsi: - Abe io nu pot ta s-mãc (dzãsi)! Aestu, am tsiva tu bric (dzãsi), i spusi a picurarlui ca va i măc oili. Shi, lu scuasi aestu Ciuciumengu di boulu, Ciuciumengu s-alinã pi un mari lemnu, sh-cãndu aclo aflã vãrã fur, furlji cari avea furatã multsã pãradz, multã aveari, sh-lã dzãsi:

- Tora voi furi, va s-yinã luchlji sh-va vã măcã (dzãsi) tuts.

Sh-furlji vdzirã, Ciuciumengu s-dipusi di pi lemnu, di ãndzeanã, di pi pom, shi u anã tutã aveari tu doi sats shi s-turnã la moashea sh-aushlu, shi sh-bãna multu ghini.

Ashi bitisi pirmiflu. Cum eara sh-tsi eara, ma ãnclo io nu shtiu. Ahãt shteam, ahãt va spush.